

- प्रधानमंत्री नरेन्द्र मोदी विकसित वाइब्रेंट विलेज कार्यक्रम-2026 रे तैत राजस्थान समेत देशभर रा प्रतिभागियां साथै बतळ करी।
- प्रधानमंत्री आकाशवाणी ऊँ मन की बात कार्यक्रम मांय जल संरक्षण सारू चलाया जा रह्या अभियान कैच द रेन रो जिक करता इण मांय लोगां री भागीदारी ने सराया।
- करगिल विजय दिवस माथे देश-प्रदेश मांय न्यारा-न्यारा कार्यक्रमां री मार्फत वीर शहीदां ने नमन करी ज्यो।
- राजस्थान रोडवेज रा बेड़ा मांय 144 नुवी बसां भेळी-मुख्यमंत्री भजन लाल शर्मा जयपुर रा हीरापुरा टर्मिनल ऊँ हरी झण्डी दिखाई।

000

प्रधानमंत्री नरेन्द्र मोदी कह्यो है के विकसित वाइब्रेंट विलेज कार्यक्रम घणो खास है। इण री मार्फत देश रा नौजवानां ने सरहदी गांवां री संस्कृति अर वठा री चुनौतियां अर रहण-सहण रा बारा मांय जाणण रो मौको मिले है। आज वीडियो कॉन्फ्रेंसिंग रे मार्फत विकसित वाइब्रेंट विलेज कार्यक्रम-2026 रा प्रतिभागियां साथै बतळ करता प्रधानमंत्री कह्यो के सरहदी गांवां मांय वठा रा लोगां मांय देश प्रेम रो खास जज्बो देखण ने मिले है। ई कार्यक्रम रे मार्फत देश रा सगळा राज्यां अर केन्द्र शासित प्रदेशां री नुमाइन्दगी कर रिया 400 ऊँ बत्ती नौजवानां साथै प्रधानमंत्री वतळ की अर वां रा अनुभव सुण्या। राज्य रा जालौर मांय भारत वॉलन्टियर सुनील कुमार आप रा अनुभव साझा करता प्रधानमंत्री ने धन्यवाद दियो।

-----

विकसित वाइब्रेंट विलेज कार्यक्रम प्रतिभागियां ने भारत रा सरहदी हलकां रा सामाजिक-आर्थिक दिखाव, सांस्कृतिक विरासत अर विकास री आस ऊँ सीधा पीछाण करावे है, साथै ही सामुदायिक भागीदारी, राष्ट्रीय एकता अर सीमाई गांवां रा रणनीतिक महत्व री गहरी समझ ने बधावो देवे है। ध्यानजोग है के ई कार्यक्रम सारू प्रतिभागियां रो चुणाव देश भर मांय ऑनलाईन क्विज होड़ री मार्फत करी ज्यो जिण मांय तीन लाख ऊँ बत्ती नौजवानां हिस्सो लियो।

000

प्रधानमंत्री नरेन्द्र मोदी कह्यो है के भारत रक्षा निर्यात, राजनीतिक मदद अर दोस्त देशां रा मामला मांय बरोबर नुवी उंचाइयां छू रह्यो है। आज आकाशवाणी रो मन की बात कार्यक्रम मांय प्रधानमंत्री कह्यो के भारत आप रा तकनीकी बूता ने बरोबर बधा रह्यो है। दुनिया रो भरोसा भारत रा हिफाजती उपकरण अर तकनीक माथे बध रह्यो है। वणा कह्यो के लारला दीतवार ने विक्रम-वन रा कामयाब प्रक्षेपण ऊँ हर भारतीय रो मान बध्यो है। ओ भारत रा नीजू हलका रो पैलो रॉकेट है। प्रधानमंत्री करगिल विजय दिवस माथे आज वीर सैनिकां ने याद कर्या अर कह्यो के ओ दिन देशवासियां ने आप रा बहादुर सैनिकां री असाधारण ताकत ने याद दीरावे है।

-----

प्रधानमंत्री पाणी बचावण रो जिको करता कह्यो के मॉनसून रो बगत जल संरक्षण सारू सब ऊँ चौखो है। सरकार कानी खास अभियान ई चलाया जावे। वणा कैच द रेन अभियान रो जिको कर्यो अर लोगा री इण मांय बढ़ चढ ने हिस्सो लेवण री कोशिश ने सरावण जोग बताया।

-----

प्रधानमंत्री कह्यो के कुछ दिन पैला ग्लासगो मांय शुरू व्ह्या राष्ट्रमंडल खेलां मांय भेळा खिलाडियां रो पूरो देश साहस बधा रह्यो है। पीवी सिंधु जापान ओपन बैडमिंटन मांय खिताब जीतण वाळी पैली भारतीय खिलाड़ी बणी। श्री मोदी गणेश उत्सव रे दौरान सगळा ऊँ पीओपी ऊँ बणी मूर्तियां री ठौड़ माटी ऊँ बनी गणेश मूरत री पूजा करण री अरज करी। प्रधानमंत्री कह्यो के देशभर मांय 7 अगस्त ऊँ 'राष्ट्रीय हथकरघा दिवस' मनायो जावेला। ओ दिन देश रा बुनकरां हुनर अर रचनात्मकता रा सनमान रो प्रतीक है। वणा हस्तकला ने बधावो दे र बुनकरां ने सनमान देवण री अरज करी। प्रधानमंत्री 15 अगस्त ने मनाया जावण वाळा स्वतंत्र दिवस रा बारा मांय बात करी कह्यो के ओ दिन हर भारतीय सारू मान रो दिन है।

-----

श्री मोदी सगळा ऊँ हमेशा री तरह 15 अगस्त ऊँ सारू मांय गोव पोर्टल माथे आप रा विचार अर सुझाव साझा करण री अरज करी।

000

प्रदेश मांय ई मन की बात कार्यक्रम ने ले र उमाव निजर आयो। मुख्यमंत्री भजनलाल शर्मा आज जयपुर रा सांगानेर मांय आदिवासी महिलावां रे बीचे 'मन की बात' रा 136 वी कडी ने सुण्या। भाजपा प्रदेश अध्यक्ष मदन राठौड़ पाली मांय मन की बात कार्यक्रम ने सुण्या। इस मौके न्यारा-न्यारा जन नुमाइन्दा अर लोग मौजूद रह्या। राज्य री दूजी ठौड़ा माथे ई मन की बात कार्यक्रम ने उमाव रे साथे सुणी ज्या।

000

करगिल विजय दिवस माथे आज देश-प्रदेश शहीदां ने नमन करे। ई मौके 1999 रा करगिल युद्ध मांय देश री हिफाजत करता ठावो बलिदान देवण वाळा भारतीय सैनिकां ने श्रद्धांजलि अर्पण करी जावे। राष्ट्रपति द्रौपदी मुर्मू वीर सैनिकां ने नमन करता सोशल मीडिया पोस्ट मांय कह्या के सैनिकां री अदभूत ताकत, अटूट संकल्प अर देशभक्ति भारतीय सशस्त्र बलां री ठावी परम्परा री मिसाल है। लोकसभा अध्यक्ष ओम बिरला कह्यो के करगिल युद्ध भारतीय सेना रा इतिहास रो सोना ऊँ मण्ड्यो पाठ है। अठिने राज्यपाल हरिभाऊ बागडे कह्यो के करगिल विजय दिवस फगत फौजी जीत री याद नी है बल्कि देश री अस्मिता, अखण्डता अर सम्प्रभुता री हिफाजत सारु भारतीय सैनिकां कानी ऊँ करी ज्या ठावा बलिदान अर अदम्य साहस ने नमन करण रो पावन मौको है। श्री बागडे कागिल विजय दिवस रे मौके जोधपुर मांय कीडा भारती री कानी ऊँ व्ह्या कार्यक्रम मांय बोल रह्या हा। ई मौके 16 वीर सैनिकां अर वीरांगनावां रो सनमान ई करी ज्यो। कार्यक्रम मांय केन्द्रीय मंत्री गजेन्द्र सिंह शेखावत समेत केई जन नुमाइन्दा मौजूद रह्या। अठिने मुख्यमंत्री भजनलाल शर्मा वीर सैनिकां ने श्रद्धांजलि देवता कह्यो के आ वीर जवानां नी शहादत अर निष्ठा माथे हर भारतीय ने मान है। वां री वीरता री गाथावां हमेशा आवण वाळी पीढियां ने सीख देवती रहवेला। ई मौके आज जयपुर रा अमर जवान ज्योति माथे अमर सैनिकां ने पुष्पांजलि अर्पण कर ने भाव पूरण श्रद्धांजलि दीरीजी। विधानसभा मांय करगिल शौर्य वाटिका मांय बण्या स्मारक थल माथे विधानसभा अध्यक्ष वासुदेव देवनानी पुष्पचक्र अर्पण कर ने शहीदां ने नमन कर्यो। झुन्झुनू, चूरू, भरतपुर समेत प्रदेश रा केई जिलां मांय करगिल शहीद दिवस रे मौके श्रद्धांजलि सभा, सम्मान जळसा, संगोष्ठी समेत न्यारा-न्यारा कार्यक्रम व्ह्या।

000

केंद्रीय मंत्री प्रल्हाद जोशी आज शिक्षा मंत्री रो कामकाज संभाळ्यो। धर्मेन्द्र प्रधान रे इस्तीफो देवण रे पछे काले वां ने नुवा शिक्षा मंत्री बणायी ज्या हा। सोशल मीडिया पोस्ट मांय, श्री जोशी नुवी जिम्मेदारी सौंपण सारु प्रधानमंत्री नरेन्द्र मोदी रो आभार प्रकट कर्यो।

000

मुख्यमंत्री भजनलाल शर्मा आज जयपुर रा हीरापुरा बस टर्मिनल ऊँ रोडवेज री 144 नुवी बसां ने हरी झंडी दिखा र रवाना कर्या। ई मौके मुख्यमंत्री सड़क सुरक्षा सारु जाग जगावण रो संदेश देवता सड़क सुरक्षा अग्रदूत महिलावां ने हेलमेट ई बाट्या। वणा प्रदेशवासियां ऊँ यातायात कानून री पालण करण अर दोपहिया वाहन चलावती बगत जरूरी हेलमेट पहरण री अरज करी। मीडिया साथे बतळ करता मुख्यमंत्री कह्यो के सरकार जनकल्याण ऊँ जुड्या हर हलका मांय तेजी ऊँ काम कर री है। श्री शर्मा कह्यो के प्रदेश मांय बरोबर सार्वजनिक परिवहन सेवा रो पसारो कर्यो जावे जिण ऊँ लोगां ने हिफाजती सरल अर सुविधा पूरण जात्रा मुहैया व्हे सके।

-----

कार्यक्रम मांय उप मुख्यमंत्री अर परिवहन मंत्री डॉ. प्रेमचंद बैरवा, सांसद मंजू शर्मा समेत केई जननुमाइन्दा मौजूद रिया।

000

जालौर जिला रा सांचौर मांय आज बस अर ट्रक री टक्कर मांय बस सवार दो लोगां री मौत व्हे गयी अर 12 जातरी घायल व्हे ग्या। घायलां ने सांचौर रा ट्रामा सेन्टर मांय ईलाज सारु भेज्या है। आ बस सांचौर ऊँ गुजरात जाय री ही।

000

प्रदेश रा केई जिलां मांय मॉनसून सक्रिय बण्योड़ो है। भीलवाड़ा मांय आज संवारां ऊँ ई हल्की बिरखा रो दौर चालतो रियो। जालौर मांय ई रुक-रुक ने बिरखा व्हेती री। झुन्झुनू जिला मांय दोपहरा पछे केई ठौड़ा बिरखा होवण ऊँ मौसम सुहावणो व्हे ग्यो। वठे ई राज्य मांय केई ठौड़ा व्हे री बिरखा ऊँ जलाशया मांय पाणी री आवक बण्योड़ी है। मौसम केन्द्र मुजब आज राज्य रा दीखणाद-आथूणी हलका मांय हल्का ऊँ मुझला अर कठेई-कठेई तेज बिरखा होवण री आस है। महकमो आवती 28 तारीख ऊँ ऐकर फैरू बिरखा री गतिविधियां मांय बढवार होवण अर उत्तर अगूणी हलका मांय कठेई-कठेई भारी बिरखा होवण री आस जतायी है। 29 जुलाई ऊँ 2 अगस्त ताई राज्य रा घणखरा ठौड़ां हलका ऊँ मझला अर कठेई-कठेई भारी बिरखा री आस है।

000

भारत री अनाहत सिंह विश्व स्क्वाश जूनियर चैंपियनशिप जीत ने इतिहास रच दियो है। कनाडा मांय महिला सिंगल्स फाइनल मांय मिस्त्र री रुकैया सालेम ने हरा र वणा खिताब जीत्यो। ई जीत रे साथै अनाहत जूनियर विश्व खिताब जीतण वाळी पैली भारतीय स्क्वॉश खिलाड़ी बण गयी है।

000